



釋迦如來應化錄

下三

波
5-02
6



門八
卷 502
卷 6

消印

釋迦如來應化錄下目錄三

育王起塔	均分舍利	凡火不然	金棺自舉	佛從棺起	昇天報母	金剛哀戀	佛母得夢
育王得珠	結集法藏	聖火自焚	佛現雙足	金棺不動	佛母散花		

唐七錄下目錄三

迦葉付法	迦葉入定
商那受法	龜多籌筭
蜜多持幡	馬鳴辭屈
龍樹造論	提婆鑿眸
天親造論	神僧應供
十大明王	護法諸天
師子傳法	達磨西來

釋迦如來應化錄下三



釋迦如來應化錄下三

金剛哀戀

報恩寺沙門寶成編集

金剛力士哀戀經云爾時世尊初入涅槃時密迹金剛力士見佛滅度悲哀懊惱作如是言如來捨我入于寂滅我從今日無歸無依無覆無護衰惱災患且頓集憂愁毒箭深入我心此金剛杵當用護誰即便棄擲自今以往當奉侍誰誰當慈愍訓誨於我更於何時得親尊顏說種種言戀慕如來時天帝釋語力士言汝今何不憶念世尊少語佛言諸行無常無得住者不可體信是變易法一切聚集皆歸散滅高

金剛力士哀戀經

者必墮合會必離有生必死一切諸行猶如河岸臨
峻之樹亦如畫水尋畫尋滅亦如水泡如草頭露不
得久停如乾闥婆城暫為眼對人命迅速疾如射箭
速行天下疾如日月人命速疾過於是天無常敗壞
應當解知若於佛事有不足者不入涅槃佛事周訖
乃入涅槃以此佛法付囑天人諸有苦盡更不受生
汝等不應生大憂惱

佛母得夢

摩訶摩耶經云爾時佛母摩訶摩耶即於天上見五
衰相現一者頭上花萎二者腋下汗出三者頂中光

滅四者兩目數瞬五者不樂本座又於其夜得五種
惡夢一夢須彌山崩四海水竭二夢有諸羅刹手執
利刀競挑一切衆生之眼時有黑風吹諸羅刹皆悉
奔馳歸於雪山三夢欲色界諸天忽失寶冠自絕瓔
珞不安本座身無光明猶如聚墨四夢如意珠玉在
高幢上恒雨珍寶周給一切有四毒龍口中吐火吹
倒彼幢吸如意珠猛疾惡風吹沒深淵五夢有五師
子從空下來嚙摩耶乳入於左脇身心疼痛如被刀
劔時摩訶摩耶見此夢已即便驚寤而作是言我於
向者眠寢之中忽然見此不吉祥事令我身心極為

愁苦今此五種惡夢甚可怖畏必是我子釋迦如來
入般涅槃之惡相也即便向餘諸天子等廣說夢中
所見之事

昇天報母

摩訶摩耶經云尊者阿那律昇於天上任摩訶摩耶
所而說偈言大師最勝天中天善道一切世間者今
已為彼無常海摩竭大魚之所吞在於拘尸那竭國
娑羅林中雙樹間不久當出城東門種種供養而闍
維天人八部眾盈滿號泣震動徹三千摩訶摩耶聞
此偈已悶絕躡地良久乃蘇而作是言我於昨夜得

五惡夢決定當知佛入涅槃今者果見阿那律來云
已滅度何其苦哉世間眼滅何其疾哉人天福盡如
何一旦便入涅槃無常惡賊極為兇暴忍能害我正
覺之子即於眾中而說偈言於無量劫來常共為母
子汝既成正覺此緝方以斷而復於今者便入般涅
槃譬如高大樹眾鳥依共棲晨且各分離到暮還歸
集與汝為母子共在生死樹既得成道果長絕此源
本又復取滅度無有會見時摩訶摩耶說此偈已涕
泣懊惱不能自勝

佛母散花

摩耶經云爾時摩訶摩耶與諸天女眷屬圍遶從空而下前至棺所垂淚悲惱而作是言共於過去無量劫來長爲母子未曾捨離且於今無相見期嗚呼哀哉衆生福盡方當昏迷誰爲開導卽以天曼陀花摩訶曼陀羅花曼殊沙花摩訶曼殊沙花用散棺上而說偈言今此雙樹間天龍八部衆唯聞啼哭音不知何所說無能解其語充塞在於地與汝爲母子曠劫積恩愛今者無常風吹散各異處在苦諸衆生希望法甘露何故便於今而速入涅槃潛身重棺中知我來此否說此偈已顧見如來僧伽梨衣及以鉢盂

錫杖右手執之左手拍頭舉身投地如太山崩悲號慟絕而作是言我子昔日執著此等廣福世間利益天人今此諸物空無有王嗚呼苦哉痛不可言時諸天龍八部及以四衆佛母摩訶摩耶憂惱如是倍更悲感淚下如雨

佛從棺起

摩耶經云爾時世尊以神力故令其棺蓋皆自開發便從棺中合掌而起如師子王初出窟時奮迅之勢身毛孔中放千光明一一光明有千化佛悉皆合掌向摩訶摩耶以梵軟音問訊母言遠屈來下此閻浮

提諸行法爾願勿啼泣即便為母而說偈言一切福田中佛福田為最一切諸女中玉女寶為最今我所生子超勝無倫比能生於三世佛法僧之寶故我從棺起合掌歡喜贊用報所生恩示我孝戀情諸佛雖滅度法僧寶常住願母莫憂愁諦觀無常行時摩訶摩耶聞說偈已小自安慰顏色暫悅如蓮花敷爾時世尊與母辭別而說偈言我生分已盡梵行久已立所作皆已辦不受於後有願母自安慰不須苦憂惱一切行無常信是生滅法生滅既滅已寂滅為最樂世尊說此語已即便闔棺三千大千世界普皆震動

摩耶遠棺還歸天上

金棺不動

涅槃經後分云爾時拘尸城內一切人民悲泣流淚總入城中即作金棺七寶莊嚴即辦微妙白氈旃檀沉水一切雜香無量香花幡蓋悲哀流淚將至佛所而伸供養爾時大眾悲號哽咽涕泣盈目哀震大千深重敬心各以白氈覆手扶於如來又金棺中注滿香油即閉棺門爾時拘尸那城內一切男女貧富善心總欲攝取如來功德不令天人一切大眾同舉佛棺即共詳議遣四力士壯大無雙脫其所著衣服期

心請舉如來聖棺欲入城內自伸供養盡其神力不能令動爾時城內復遣八大力士至佛棺所脫所著衣共舉金棺盡其神力亦不能動拘尸城內復遣十六極大力士來至棺所脫所著衣共舉佛棺亦不能動爾時樓豆語力士言縱使盡其城內人民男女大小舉如來棺欲入城內亦不能得何況汝等而能移動如來棺耶

金棺自舉

涅槃經後分云爾時世尊大悲普覆令諸世間得平等心得福無異於娑羅林即自舉棺昇虛空中高十

多羅樹徐徐乘空從拘尸城西門而入東門而出集空右遶入城南門漸漸空行從北門出乘空左遶還從西門而入徐徐乘空而行從東門出空行左遶入城北門漸漸空行從南門出乘空右遶還入西門如是展轉左右遶拘尸城經于七匝爾時如來七寶金棺當入城時一切大眾悲號哽咽各持無數微妙香木旃檀沉水一切寶香普熏世界復持無數寶幢幡蓋香花瓔珞至荼毘所悲哀供養爾時四天王及諸天眾各持天上寶香悲哀供養爾時如來大聖寶棺漸漸空行至荼毘所徐徐乘空而下安七寶牀於是

時頃復經七日爾時拘尸城內一切士女無數大眾復持香花投佛棺前頂禮供養一切大眾悲號大哭震動世界迷悶躡地

佛現雙足

處胎經云爾時世尊還攝威神在金棺裏寂然無聲諸天燒香散花供養大迦葉從摩伽提國將五百弟子來至佛所聞佛今日滅度悲啼號泣不能自勝世尊以天耳聞迦葉來至即從棺裏雙出兩足迦葉見之手捉摩拊啼泣不能自勝迦葉而說頌曰一切行無常生者必有死無生亦無死此滅為最樂佛所教

化人所度已周遍我行道迥絕深恨不見佛法界迷皆空色身亦當爾無有老病死無為無所生住壽百恒沙亦當歸滅度况我天尊師處世著穢汚時迦葉及五百弟子皆遶金棺七匝在一面立阿難捉棺西北角難陀捉棺東北角諸天在後共舉金棺去雙樹四十九步安厝金棺諸天人以牛頭旃檀香積金棺上諸梵天王釋提桓因將諸天眾在虛空中散花供養爾時大迦葉諸大弟子其身顛掉不能自持心濁迷悶發聲大哭

凡火不然

涅槃經後分云爾時一切天人大眾共舉如來大聖寶棺置於香樓之上同時號哭爾時拘尸城內有四力士璽珞嚴身持七寶炬大如車輪爛光普照以焚香樓茶毘如來炬投香樓自然殄滅迦葉告言大聖寶棺三界之炬所不能燒何況汝力而能焚耶城內復有八大力士更持七寶火炬光焰一切將投棺所亦皆殄滅城內復有十六極大力士各持七寶火炬來投香樓亦悉殄滅城內復有三十六極大力士各持七寶火炬來投香樓亦皆殄滅爾時一切海神持海中火七寶火炬無數光焰投香樓內亦皆殄滅爾

時迦葉告諸力士一切大眾汝等當知縱使一切天人所有炬火不能茶毘如來寶棺汝等不煩勞苦強欲作為爾時城內士女天人大眾復重悲哀各以所持香花號泣供養一時禮拜右遶七匝悲號大哭震大千昏迷躡地

聖火自焚

涅槃經後分云爾時如來以大悲力從心胷中火踊棺外漸漸茶毘經于七日焚妙香樓爾乃方盡爾時四天王各作是念我以香水注火令滅急收舍利天上供養作是念已即持七寶瓶盛滿香水同時而下

至茶毘所時四天王馮金瓶香水一時注火注已火
勢轉高都無滅也爾時海神娑伽羅龍王及江神河
神見火不滅各作是念我取香水注火令滅急收舍
利住處供養作是念已各持寶瓶盛滿香水至茶毘
所一時注火注已火勢如故都亦不滅時樓豆語四
天王言汝大貪心汝居天上汝若獨取舍利上於天
宮地居之人如何得往而供養耶復語海神汝在大
海江河如來舍利汝若獨取者地居之人如何得往
而供養耶爾時四天王即皆懺悔已各還天宮爾時
大海娑伽羅龍王及江神河神等皆亦懺悔誠如聖

言悔已各還本宮

均分舍利

處胎經云爾時八大國王優填王頂生王惡生王阿
闍世王四大兵馬王最豪兵馬王容顏兵馬王懺盛
兵馬王金剛兵馬王此八大王共諍舍利各領兵衆
列任一面各言佛舍利我應獨得大臣優波吉諫言
諸王莫諍舍利應分普皆供養釋提桓因現爲人語
我等諸天亦當有分阿耨達龍王文隣龍王伊那鉢
龍王言我等亦應有分優波吉言諸君且任舍利宜
共分之即分爲三分一分與諸天一分與龍王一分

與八王金瓮受石餘此臣以蜜塗瓮裏以瓮爲量卽分舍利天得舍利還於天上起塔龍得舍利還於龍宮起塔八王得舍利各還本國起塔優波吉金瓮舍利三斗并瓮亦還起塔灰及土四十九斛起四十力塔當闍維處亦起寶塔高四十九仞香燈供養懸繒幡蓋終日竟夜音樂不斷佛之威神夜放光明與晝無異常有神王守護

結集法藏

處胎經云佛滅度後經七日七夜時大迦葉告五百阿羅漢卿等五百人盡詣十方諸佛世界諸阿羅漢

盡集此處佛今涅槃闍維已訖欲得演佛真性法身汝等速集採聽微妙之言以神通力卽到十方恒河沙刹土集諸阿羅漢得八億四千衆來集於此阿難一心思惟諸塵垢滅朗然大悟聖衆稱善諸天歌歎阿難卽昇高座迦葉告阿難言佛所說法一言一字汝慎勿使有缺漏菩薩藏集著一處聲聞藏亦集著一處戒律藏亦集著一處爾時阿難發聲唱言我聞如是一時佛及說佛所居處迦葉及一切聖衆墮淚悲泣不能自勝咄嗟老死如幻如化昨日見佛今日已稱言爲我聞最初出經胎化藏爲第一中陰藏第

二摩訶衍方等藏第三戒律藏第四十住菩薩藏第
五雜藏第六金剛藏第七佛藏第八是爲釋迦牟尼
佛經法具足矣

古王起塔

阿育王傳云爾時阿育王往詣雞頭摩寺至上座耶
舍前合掌而言我今於閻浮提內造立八萬四千寶
塔上座答言善哉善哉王若欲得一時作塔我於大
王作塔之時以手障日可遍勅國界手障日時盡起
立塔王聞語已還於本宮便造八萬四千寶篋金銀
琉璃以嚴飾之二寶篋中盛舍利復造八萬四千

寶篋八萬四千寶蓋八萬四千疋練以爲莊校一舍
利付一夜又使遍閻浮提其有一億人處造一寶塔
於是鬼神各持舍利四出起塔有一夜又齎一舍利
至得义尸羅國欲作寶塔其國人言我國人民凡有
三十六億今當與我三十六篋時夜又鬼具以上事
還白於王王自念言人衆甚多若爾作者舍利不足
滿閻浮提當設方便斷而不與卽遣夜叉復語之曰
與一舍利起一寶塔王復告言多一億處與一舍利
少一億處亦莫與之

古王得珠

阿育王傳云阿育王起造八萬四千寶塔已師子國
王獻五顆如意寶珠王受珠已一施佛生塔二施佛
成道塔三施佛轉法輪塔四施佛入涅槃塔餘有二
珠欲與諸夫人若與一者恐餘者恨遣入官謂言
其有衣服瓔珞最第一者當與此珠一切夫人皆著
好衣服瓔珞唯有一小夫人名須闍哆憶念佛語戒
著衣服瓔珞受持八戒著純白衣容儀整肅王心自
然甚生恭敬阿育王次第觀諸后妃服飾瓔珞次至
須闍哆夫人問言諸夫人等皆著上服汝何素服寂
然而住須闍哆夫人荅言佛說慚愧為上服持戒為

瓔珞法音為妓樂我今受持八戒以當瓔珞著於慚
愧素服讀誦經典以為音樂王聞此語欣然歡喜復
語夫人曰我先有言其有著第一上服瓔珞者當與
寶珠汝今最為第一與汝寶珠諸夫人見得寶珠後
皆相學受持八戒

迦葉付法

付法藏經云摩訶迦葉垂涅槃時以最勝法付囑阿
難言長老當知昔世尊以法付我我年朽將欲涅
槃世間勝眼今欲相付汝當精勤守護斯法阿難曰
諾唯然受教於是阿難演暢妙法化諸眾生然其宿

命有大功德智慧淵廣多聞博達佛所咨嗟總持第一悉能聽受諸佛法藏如大巨海百川斯納名稱高遠衆所知識如是功德不可窮盡我當隨順說其因緣乃往古世定光如來時爲沙門畜一沙彌教令讀誦日夜誡勅無有休廢若經少闕即便呵責時此沙彌專心讀誦從此以後經義貫通智慧深妙總持強識多聞弘廣不可稱計爾時沙彌卽我身是摩訶迦葉告阿難曰今以法寶用相委累長老於後若入涅槃王舍大城有一長者名商那和修高才勇猛有大智慧已於過去深種善根爲佛造寺可度出家如來

法藏悉付囑之

迦葉入定

阿育王傳云尊者迦葉結集法藏已以法付囑阿難我今欲入涅槃以法付汝汝善守護迦葉往詣阿闍世王所相別語守門人言大迦葉欲入涅槃故來相語時迦葉至雞足山三岳中坐草而坐作是念言我今此身著佛所與糞掃衣自持衣鉢乃至彌勒與世令不朽壞使彌勒弟子皆見我身卽時大地六種震動迦葉將欲入定念言若阿難阿闍世王來時山當爲開令其得入若還去時山復還合釋提桓因散天

香花供養迦葉禮拜供養已山即自合覆尊者身此
山窟神名畢鉢羅見迦葉入滅作如是言今日法岳
崩壞法船已沒法樹已摧法海已竭今日諸魔得大
歡喜一切天人哀戀悲泣時阿闍世王夢天梁折壞
覺已心生驚怖守門者來白王言向者迦葉來白王
欲入涅槃王聞是語與阿難往詣雞足山山自開張
供養禮拜涕泣而還

商那受法

付法藏經云時阿難臨當滅度告商那和修曰佛以
法眼付大迦葉迦葉以法付我我以法藏用付於汝

汝可精勤守護斯法令諸眾生服甘露味商那和修
答曰奉教我當擁護如斯妙法普為一切作大明燈
於是廣施無上法藥療煩惱病濟度羣生其德高遠
久修願行多聞總持辯才無盡今當敷演彼功德聚
乃往過去劫我為商王見辟支佛身嬰重病氣命羸
瘠與諸商人即便停住推求醫藥而療之盡心承給
無所乏少病遂除差氣力充足是辟支佛者商那衣
商王以上妙衣用以奉獻白言大聖此商那衣極為
弊惡唯願受我所奉衣服辟支佛言施主宜知我以
此衣出家成道復當著此而入涅槃阿難以法付囑

告曰世尊昔游摩突羅國顧命我言此國中有長者
子號曰優波鞠多我滅度後與大饒益汝當於後度
令出家付其法藏

鞠多尊者等

付法藏經云尊者阿難以法付囑商那和修告曰世
尊昔游摩突羅國顧命我言此國中有長者名鞠多
其子名優波鞠多我滅度後與大饒益教化無量衆
生汝當度令出家若涅槃時付其法藏商那和修
付其法觀察鞠多為生子耶入定思惟知未出世詣
鞠多舍鞠多問曰何獨無侶答言長者我無俸祿有

信出家乃見隨耳鞠多復言吾樂世俗不能出家若
後生子當相奉給後生一子名曰優波鞠多年十二
歲巧於市易商那和修即至其所而為說法漸以方
便教令繫念以黑白石子用當籌筭若起惡心當下
黑石子設生善念下白石子優波鞠多奉受其教攝
念不散善惡心起輒投石子初黑偏多白者漸少漸
漸修習白黑正等繫念不止心轉純淨更無黑石純
有白者善念已盛速得初果商那和修以
付囑之汝當守護

密多持幡

付法藏經云尊者佛陀密多念言吾師難提以法付
我我當云何敷宣正法令諸眾生普得饒益復念今
此國王甚大邪見我宜先往而調伏之躬持赤幡在
王前行王問何人在吾前行荅言大王我是智人善
能談論欲於王前求一試驗時王宣令國內所有婆
羅門長者居士聰明博達善於言辭悉令集吾殿上
與一沙門共對議論於是_一一切邪見外道競來雲集
時彼大王於正殿上羅布茵褥密多即昇法座共諸
外道建無方論淺智之者一言即屈其多聰辯再便
辭盡王見諸人理皆窮匱躬與密多有共議論始起

言端亦尋屈已密多思念我與王論不應顯勝而語
之言此義淺深王自解了爾時彼王即知其屈迴改
邪心敬信正法受三自歸為佛弟子於自國土弘宣
道化時此國中邪見尼乾子師徒五百人至密多所
俱共出家

馬鳴辭屈

付法藏經云有大士名曰馬鳴智慧淵鑿超識絕倫
有所難問靡不摧伏計實有我甚自貢高聞有尊者
名富那奢智慧深遠多聞博達言諸法空無我無人
懷輕慢心往詣其所而作是言一切世間所有言論

我能毀壞如雷摧草此言若虛而不誠實要當斬古
以謝其屈富那奢言佛法之中凡有二諦若就世諦
假名為我第一義諦皆悉空寂如是推求我何可得
爾時馬鳴心未調伏自恃機慧猶謂已勝富那語曰
汝諦思惟無出虛語我今與汝定為誰勝是時馬鳴
即自念言世諦假名定為非實第一義諦性復空寂
如斯二諦皆不可得既無所有云何可壞我於今者
定不及彼便欲斬告以謝其屈富那語言我法仁慈
不須斬告宜當剃髮為吾弟子爾時尊者度令出家
而告之曰我以法藏持用付汝汝當於後至心受持

今未來世普皆饒益

龍樹造論

付法藏經云馬鳴大士付法比羅長老比羅臨滅便
以法藏付一大士名曰龍樹然後捨命龍樹於後廣
為眾流布法眼以妙功德用自莊嚴天聰奇悟事
不再問建立法幢降伏異道時南天竺國王甚邪見
承事外道毀謗正法龍樹菩薩為化彼故即詣王所
王問汝是何人答言我是一切智人王勅集諸婆羅
門與諸外道共與沙門廣共論議時諸外道聞是事
已悉來雲集含怒懷嫉來競言辯於是龍樹昇座其

愚短者一言便屈小有聰慧極全再問詞理俱盡無
量邪見外道皆悉降伏剃除鬚髮俱共出家如是展
轉廣度衆生乃至無數廣開分別摩訶衍義造優波
提舍論有十萬偈莊嚴佛道大慈方便如是等論各
五千偈令摩訶衍光宣於世造無畏論滿十萬偈中
論出於無畏部中凡五百偈其所敷演義味深遠摧
伏一切外道勝幢

提婆毘舍論

提婆傳云提婆菩薩博識淵覽才辯絕倫國中有大
自在天人有求願能令現世如意提婆詣神前言神

鑒我心惟命是從神言我所乏者左眼能與我者便
可出之提婆言敬如天命卽以左手出眼與之天神
力故出而隨生索之不巳從且至暮出眼數十神曰
真上施也欲求何願必如所願於是而退剃髮法服
於四衢道中敷高座作三論言一切諸聖中佛聖取
第一一切諸法中佛法正第一一切救世家佛僧爲
第一八方諸論士有能壞此語者我當斷首以謝其
屈立理不明是爲愚痴輒以謝屈甚不惜也八方論
主旣聞此言亦各來集而立誓言我等不如提婆言
我所修法仁活萬物汝當剃鬚髮以爲弟子各撰名

理建無方論若辭理俱乏者即皆剃髮為僧提婆是
龍樹弟子人未歸信欲揚正法乞神求願由是建大
論場降伏一切外道

天親造論

成道記註天親菩薩是無著菩薩俗中親弟法中小
師始宗有部造五百論明斥大天生無敵敵者無
着是初地菩薩觀其弟大乘根緣將熟乃假疾召歸
甫近一驛遣一弟子往接至夜同館宿其弟子夜誦
大乘一偈云若人欲了知三世一切佛應觀法原性
一切惟心造天親聞之豁悟解大乘正理且誨昔誹

斥深咎何補原其罪本但是舌根乃起手執利刀欲
截其舌無着遙知伸臂捉住諭之曰汝悟大乘益其
時矣昔以舌毀宜以舌讚可補其過且斷舌不言其
利安在天親受教乃止洎觀本師諦聽慈旨造大乘
論百法論五蘊論二十唯識論三十唯識識等論無
着首暢大乘在阿瑜闍國大講堂中入法光定夜具
兜率天宮請聖慈尊說瑜伽論廣明五分計七地義
金剛經義無着約十八住處造論二卷天親約斷二
十七疑造論二卷

神僧應供

法任記云師子國有羅漢名慶友具八解脫三明六
通皆悉具足告大衆言如來先已說法任經佛般涅
槃時以無上法付囑十六大阿羅漢并眷屬等令其
護持使不滅没及勅其身與諸施主作真福田令彼
施者得大果報復說十六阿羅漢名第一賓度羅跋
羅情闍第二迦諾迦伐隄第三迦諾迦跋釐檮闍第
四蘇頻陀第五諾矩羅第六跋陀羅第七迦哩迦第
八伐闍羅弗多羅第九戌博迦第十半託迦第十一
羅枯羅第十二那伽犀那第十三因揭陀第十四伐
那婆斯第十五阿氏多第十六注茶半託迦皆具三

明六通承佛勅故以神通力或詣寺中經行等處安
布卧具衣藥飲食奉施衆僧此阿羅漢及諸眷屬隨
其所應分散往赴現種種形蔽隱聖儀同常凡衆密
受供養爲諸施主作真福田得勝果報令正法久住
世間饒益一切有情

十六明王

十忿怒明王經云大毘盧遮那如來常住安樂三摩
地常不離大智大行大慈大悲救度衆生告金剛手
菩薩言我今放光欲說大智大自在幻化細瑜伽大
教王金剛大智方便行一切義海所作最勝於一切

教中上中，最上能善安樂有情，入智慧方便，大自在。
金剛救度大樂金剛三摩地，從定出已，放大光明照
於眾會，說大幻化網瑜伽大教三昧曼那羅明王觀
想儀軌法。一、焰鬘得迦忿怒大明王。二、無能勝大忿
怒明王。三、鉢訥鬘得迦大忿怒明王。四、尾觀難得迦
大忿怒明王。五、不動尊大忿怒明王。六、吒枳大忿怒
明王。七、你羅難拏忿怒明王。八、大力大忿怒明王。九、
送婆大忿怒明王。十、嚩日羅播多羅大忿怒明王。此
十大忿怒明王，各有三面面，各三目，皆頭上頂佛以
虎皮為衣，鬪體為冠，髮髻豎立，持明之者，依法觀想。

一切行願無不成就

護法諸天

諸天傳云：一、娑婆界主號令獨尊大梵天王。二、地居
世主初利稱王帝釋尊天。三、北方護世大藥叉主多
聞尊天。四、東方護世乾闥婆主持國天王。五、南方護
世鳩槃荼主增長尊天。六、西方護世為大龍主廣目
天王。七、親伏怨魔誓為力士金剛密迹八尊特之主
居色頂天摩醯首羅九二十八部總領鬼神散脂大
將十能與總持大智慧聚大辨才天。十一、隨其所求
令得成就大功德天。十二、般憂四部外護三洲常獻

天神十三增長出世證明功德堅牢地神十四覺場
垂蔭因果互嚴菩提樹神十五生諸鬼王保護男女
鬼子母神十六行日月前救兵戈難摩利支天十七
百明利生千光破暗日宮天子十八星王宿王清涼
照夜月宮天子十九祕藏法寶王執群龍娑竭羅王
二十掌幽陰權為地獄王閻摩羅王皆護國安民護
教護脩行人流通正法
師子傳法
付法藏經云佛以正法付大迦葉迦葉展轉付囑次
至尊者名曰師子於罽賓國大作佛事以僧伽黎衣

傳付弟子婆舍斯多曰如來正法眼藏今轉付汝汝
應保護普潤來際偈曰正說知見時知見俱是心當
知卽知見知見卽于今如此之法為大明燈能照世
間愚痴黑暗是故諸賢聖人皆相守護更相付囑常
轉法輪為諸眾生起大饒益斷塞惡道開入天路速
至最後斯法衰滅賢聖隱沒無能建立世間暗明造
作惡業行十不善命終多墮三途八難是故智者宜
當觀察無上勝法有大功德微妙淵遠不可思議譬
如估人欲過大海必乘船航然後得度一切眾生亦
復如是欲出三界生死大海必假法船方得度脫真

善知識為大利益濟諸苦惱解除疑網婆舍斯多蒙
師開悟心地朗然默然心服俾之他國隨機演化受
教作禮而去

達磨西來

佛祖通載云初祖菩提達磨南印度國香至王第三
子王薨師出家遇二十七祖般若多羅付以大法因
問我既得法宜化何國多羅曰汝得法已俟吾滅度
六十餘年當往震且國闡化曰彼有法器堪繼吾宗
千載之下有留難否多羅曰汝所化方得菩提者不
可勝數吾滅度後彼有劫難水中文布善自降之汝

至時南方不可久留聽吾偈曰路行跨水復逢羊獨
自悽悽暗渡江日下可憐雙象馬二株嫩樹久昌昌
復演八偈皆預為識多羅示寂演化本國會其姪異
見王者輕毀三寶師遣其徒波羅提微現神力攝化
歸正師既震且緣孰即別其眾而異見王枉駕見師
因告之曰當勤修福行護持三寶吾去非晚一九卽
回王泣曰叔既有緣在彼非吾所留唯願不忘父母
之國事畢早回遂具大舟實以眾寶王躬率臣僚送
至海濱遂達于廣州

釋迦如來應化錄下 三終

于時正保第五戊子年孟春吉辰

板木屋

西田勝兵衛開板

因書文曰當世... 西田勝兵衛開板... 孟春吉辰... 戊子年... 正保第五...

